



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8



Modi sorkari Canada anema inyaksü amokmerenogo



Chepngetich-i Chicago nung marathon world record ka yangluogo

VOL. XXII ISSUE NO. 06 (ADOK 06) DIMAPUR

SANGTENNÜ (TUESDAY)

MONGPUTENI (OCTOBER) 15, ₹ 5.00

NSCN-K (Nikki)-i ceasefire ground rules sülen anidaksü nangzükogo: CFSB Chairman

Dimapur, October 14, 2024 (TYO): October 10, 2024 nü Padampukhuri nung NSCN-K (Nikki) teloki nisung ana pur aoba atema Hombarnü Western Naga Youth Frontal Organisation Interim body aser Ceasefire Monitoring Group tsüngda senden ka menogo.

Iba tatalokba dak sendakba nung October 12, 2024 nü Hotel Saramati nung Dimapur, Niuland aser Chumoükedima district tem nungi lanur teloktem adenshia senden ka amendang Western Naga Youth Frontal Organisation tentetsü bangjemtepa liasü.

NSCN-K (Nikki)-i ceasefire ground rules alema inyakba aser ceasefire office tim mesü amshiba nangzükogo aser parnok ground rules sülen anidaksü mulungogo ta CFSB

Chairman, Amarjeet Singh Bedi i senden nung ashi.

NSCN-K (Nikki) dang nisung pur aoba nung shilem agirtem pur police ket nung agütsütsü shiogo ta CFSB Chairman-isa ashi.

India sorkar aser NSCN-K (Nikki) tsüngda 2021 küm ceasefire agreement nung sign sütep aser September 2024 nung küm ka atema atsülangogo. Iba tenangzüktepa ya yimjung bener arutsü, kati ka angateteptsü aser temulung lemteptsü atema agiba lir aser iba ajanga India sorkar den Naga yimten tebilemstü tiptema olemtepa aotsü ta paisa ashi.

CFSB chairman den senden amenba osang metetsü atema tanü anüngdang Naga lanur aika Aoyimti village ground nung adenshia liasü.

'Ticket to Hornbill' ayonga agitsü

Kohima, October 14, 2024 (TYO): Shreyas Group-i October 18 nungi 21, 2024 tashi RCEMPA, Jotsoma nung 'Ticket to Hornbill' ayonga amongtsü.

"Hornbill-India's Biggest Band Battle 2024" ya 25 buba Hornbill Music Festival, Nagaland lapokba sentong lir ta Task Force for Music & Arts (TaFMA) chairman Theja Meru-i ashi.

October 18 aser 19 anogotem Ticket to Hornbill nung live performance rounds nung bands 30-i shilem agitsü. Parnok rongnungi bands 7 shimteter October 21 nü grand finale nung shilem agitsü.

Ticket to Hornbill live performance rounds atema tetendangertemji Arpito Gope, Moanungsang aser Viveick Rajagopalan nung asütsü.

Külen, grand finale atema tetendangertem rongnung Subir Malik, Sonam Kalra, Arpito Gope, Suraj Mani aser Moanungsang nung asütsü.

'Ticket to Hornbill'- India's Biggest Band Battle' atema senpet ajak agi Rs. 4 million lezmüka lir. 1st prize Rs. 2 million, 2nd Rs. 1 million aser 3rd prize Rs. 5 lakh.

Maneni, kijatem nem Rs. 5 lakh jenjang musical equipment sempet agütsütsü aser Coca Cola-i official beverage partner aser Sennheiser-i audio partner ama shilem agitsü.

October 18 aser 19 anogotem anüngdang 12:00 ako nungi tenzüksü aser angati repringtsü akok. Ajisüaka, October 21 nü grand finale nungbo entry fee Rs. 50 agitsü.

Manipur nung Meitei, Kuki aser Naga MLA tem külem senden amentsü

Guwahati, October 14, 2024 (Agencies): Manipur nung yaküm nungi kin o kin tsüngda rara adokba sülen Meitei, Kuki aser Naga MLA kar New Delhi nung senden amentsü atema ogo.

Home Ministry ketdangsüba kübok Mongulbarnü parnok külem senden ka amentsü ta ketdangsürtemi ashi.

Iba senden nung Naga MLA asem adentsü saka Meitei o Kuki nung kwi adentsü mejangja lir.

"Centre-i rara adoka alilba kintem tsüngda olemtep tenzüksü merangba nung iba senden ya ka lir" ta ketdangsür

kati ashi.

May 2023 nungi Manipur nung kin o kin tsüngda rara adokba sülen nisung 200 tema süogo.

"Naga MLA asem- Awangbou Newmai, L Dikho aser Ram Muivah nungeri New Delhi senden nung adentsü" ta ketdangsüri ashi.

Par asemprong ya Naga People's Front (NPF) MLA tem lir aser parnok Manipur nung BJP sorkar den yariteper.

"Meitei nungeri BJP MLA kar New Delhi-i apusoa ogo aser tanüngba tanü aotsü" ta ketdangsürisa shisem.

Union Minister Jual Oram-i Zunheboto semdang



October 14, 2024 nü Zunheboto Multi-purpose hall nung Union Minister for Tribal Affairs Jual Oram den tangartem külemi agiba noksa ka angur.

Dimapur, October 14, 2024 (TYO): Union Minister for Tribal Affairs Jual Oram-i anogo asemnü atema Nagaland semdangi arua lir.

October 13 nü Union Minister Oram-i Sovima nung Chief Minister Neiphiu Riod den ajurutepa senden ka amen.

Senden nung Eklavya Model Residential Schools (EMRS) aser National Scheduled Tribes Finance and Development Corporation dena terenlok matapong atema senotsü timi amshitsü lemsatop.

October 14 nü Oram-i Zunheboto semdang aser Akuhaito Aspirational Block den tanga schemes inyakba meyipa repringshia liasü.

Tribal Affairs Advisor H Tovihoto Ayemi; Food & Civil Supplies and Legal Metrology Advisor KT Sukhalu aser MLA Picto Shohe nungeri Union

Minister Oram meina liasü.

Centre sorkari schemes aser benefits agütsüba maparen meyipa repringshitsü atema pa aru ta Zunheboto Multi-purpose hall nung jembidang Oram-i ashi.

Pa o jembitsü atema masü saka Nagaland nung alirtem indang tebilemstü aser khurettem angadangtsü atema aru ta ashi.

Prime Minister Narendra Modi-i minister ajak dang linük kübok kinük ajak aser talisa Northeast semdangtsü tetuyuba agütsüba ama pa aru ta Oram-isa metetdaksü.

"October 2 nü Prime Minister-i 'Dharti Aaba Janjatiya Gram Utkarsh Abhiyan' tenzüksüogo. Iba mapa asoshi Rs 79,156 crore lezmüksüogo aser iba ajanga Aspirational Districts nung lisopor teimba ser aliba yimtsüng 63,000 ajangzüksü. Iba nung Akuhaito dena lir, taruba küm pungu tsüngda ministry 17

yaritepa scheme 25 inyaksü" ta pai ashi.

Linük nung Rs 2,834 crore endoka Eklavya schools tasen 40 lapokogo aser schools 25 tema atema lung azüngtsüogo. Maneni, PM-JANMAN kübok Rs 1,365 crore endoka gari lenmang kilometer 1,387, Anganwadis 120, Multi-Purpose Centres 250 aser school hostels 10 yangluogo, ta Oram-i metetdaksü.

Union Minister Oram-isa Diphupar nung Eklavya Model Residential School (EMRS) semdanga liasü aser iba mapang Tribal Affairs Advisor H. Tovihoto Ayemi-i pa meina ao.

October 15 nü Oram-i Indisen village, Dimapur nung community hall tasen ka lapoktsütsü aser iba ajanga sorkari infrastructure development ajanga lisopor tem ajungkettsü nangzükba kuli sayur.

Nagaland nung 83 buba Brahmaputra Board senden menogo

Dimapur, October 14, 2024 (TYO): October 14, 2024 nü Niathu Resort, Chumoükedima nung 83 buba Brahmaputra Board senden menogo.

Iba senden ya Department of Water Resources, Nagaland-i acha-ayanga agi aser Brahmaputra Board Chairman Dr. Ranbir Singh, IAS(R) menden ser amen.

Brahmaputra Board ya Ministry of Jal Shakti, Department of Water Resources, River Development & Ganga Rejuvenation kübok lir.

India sorkari North East Region (NER) nung erosion control works aser flood control measures sentong atongtsü aser

inyaksü atema iba board tentet.

Senden nung Brahmaputra Board, NERIWALM, NEHARI, Survey of India (SOI) aser Sikkim dak alaka tanüngba NE state tem nungi Water Resources Nagaland ketdangsürtem aden.

Linük nung water resources management maparen nung North Eastern States ya kanga tongtipang lir kechiyong Northeast nung ayong tulutiba Brahmaputra lir aser linük nung ayongtem 30% tashi idaki lir, ta Chairman Dr. Ranbir Singh-i ashi.

"NE states nung ali anenzüka aoba, tzümetsüng, nisung taküm laluba, kiojen raksaba amala

khurettem ajurur. Anungji asenoki water resources department den amalitepa item khurettem asoshi mapa inyaksüla. Northeast state temi Brahmaputra Board tashi itdaksütsüla aser yamaji asü nung dang onoki mapa tajungba inyaktetsü" ta pai ashi.

"Brahmaputra Board nung deputy engineers, superintendent engineers aser executive engineers peria mali anungji state temi board tashitaitba akümtsü atema nübotem agütsütsü mepishir. Taruba küm pungu tsüngda ketdangsürtem agütsüra board kanga melenshitsü aser mapa tuluba inyaktetsü" ta Dr. Ranbir-isa ashi.

Chümoukedima nung AIF indang workshop ayongzük



Agri Expo, Chümoukedima nung October 14, 2024 nü Agriculture Infrastructure Fund (AIF) indang workshop ka ayongzükba nung Samuel Praveen Kumar, Joint Secretary of the Ministry of Agriculture & Farmers Welfare angur.

Dimapur, Mongputeni/Oct. 14 (TYO): Chümoukedima nung aliba Angh House, Agri Expo nung October 14, 2024 nü Agriculture Infrastructure Fund (AIF) indang workshop ka ayongzükba liasü.

Iba sentong nung Joint Secretary, Ministry of Agriculture & Farmers Welfare, Samuel Praveen Kumar ajanga Agriculture Infrastructure Fund (AIF) indang tongtipang inyakyim lemsatepa liasü.

Iba scheme ajanga India nung aluyimba tsütsü ki o jen tasenba kumdaktsür, alu nung züsentetba tali kumdaktsür aser aluyimer tajangzük tali angur, ta Kumar-i ashi.

Pai iba scheme nungi tajangzük anguba indang jembidang sen crore ana tashi loan agiba nung 'interest subvention' nung shilem asem lir aser 'repayment terms' balala lir, aser ano project ya post-harvest management, poly houses, aser logistics facilities ama balala lir ta ashi.

Aluyimba tsütsü AIF amshia

aluyimer, cooperatives aser aluyimer tentet balala yaritsü asoshi sorkari temulung agüja inyaker, ta pai ashi.

Technology aser maparen tasen ajanga aluyimba tsütsü temelenshi tasen aser tajung arudaktsütsü, precision farming, AI aser smart irrigation systems ajanga alu nungi chiyongtsü tali züsenteter, rongsen tajemba indoker aser mapang talanglang amshitsü yimya tali sayur, ta ashi.

Sorkari item inyakyim nungji sen indoker, anungji aluyimer asoshi tarutsü jenjang ajungtsü aser tajangzük alitsü, ta Kumar-i ashi.

Ajidang masü yimdak yimtsüng, healthcare aser shisaliok tsütsü terenlok asoshia sorkari temulung agütsütsü, ta pai ashi.

Sorkari inyakba nungya irrigation systems tajungba kumdaktsüba, modern farming techniques amshiba aser small-scale farmers yaritsü atema cooperatives tenzükdaktsüba dena lir. Sorkari Nagaland nungi

adokba süngjang-lijang ya national aser global markets nung aيتدaktsütsü asoshi temulung tali agütsütsü, ta pai ashi.

Iba sentong nung North East Region dak rangloker AIF team ajanga presentation balala agüja liasü.

AIF yagi cold storage, warehouses aser processing units amala project nem senotsü teyari agütsütsü nükjidong lir.

Sentong nung lokti tentet balala, aluyimer, sorkar ketdangsur temi iba fund yagi region nung aluyimba melenshitsu, ta temulung lema lemsatep.

Deputy General Manager of NABARD, O. P. Mounklang ajanga scheme nung maongka aser tayongzükba balala aliba indang jembia liasü.

Iba sentong nung Agriculture Production Commissioner Nagaland, Wezope Kenye ajanga pela agizükba o jembi, kong Joint Secretary Agriculture Department, Limanenla menden liasü.

Mokokchung nung pensioner dang life certificate agütsütsü ashir

Dimapur, Mongputeni/Oct. 14 (TYO): Sr. Treasury Office, Mokokchung nungi pension sen agizüker pensioner ajunga dang life certificate den pensioner association office Mokokchung nungi renew sür aliba identity card 'D' aser pension payment order book (PPO), Aadhar aser bank pass book Xerox copy agütsütsüla, ta Treasury Officer, Mokokchung, Temsupongla ajanga sangdong ka nung metetdaktsü.

Life certificate ya office nungi mapa inyakba anogo ajak

nung meshitetsü. Agüja aliba anogotem nung nüngdakba documents magütsür nem pension magütsütsü, ta ashi.

Ozüng nung aliba ama pensioner takum aliba jangjatsü asoshi iba maparen ya inyaker.

Sangdong ajanga ashiba agi, Tsusapang, Sungkumen, Tongdentsuyong, Alempang, Alongmen, Dilong aser Yimyu ward nung aliba pensioner temi shia aliba document tem November 4, 2024 nü agütsütsüla.

November 5, 2024 nü Kapayong, Salangtem, Penli, Majakong, Artang, Marepkong aser Lijabalijen ward nung alirtem, November 6 nü Mongsenbai, Kumlong, Kichutip, Sangtemla, Arkong aser Aongza ward nung alirtem indang document verify asütsü.

Maneni November 7, 2024 nü Ongpangkong Range aser November 8, 2024 nü Asetkong, Langpangkong, Jangpetkong, Tsurangkong aser Japukong Range atema inyaktüsü.



Directorate of Health & Family Welfare totuyuba kübok District Mental Health Programme (DMHP) Mon ajanga October 10, 2024 nü "It is Time to Prioritize Mental Health in the Workplace" omen nung ajemdaker Conference Hall, District Hospital Mon nung World Mental Health Day munga liasü. Iba sentong ayongzükba atema CMO, Mon Dr. Supongmenla-i DMHP, Mon dang pelaba lemsatep aser küm asem tashi district nung maparen balala inyakba atema tenüngsang agüja liasü.

DC Dimapur ajanga metetdaktsür

Dimapur, Mongputeni/Oct. 14 (TYO): Deputy Commissioner, Dimapur, Dr. Tinojongshi Chang, NCS ajanga Dimapur district kübok aliba District Heads of Departments ajunga dang October 15, 2024 nü Union Minister for Tribal Affairs, Jual Oram den State Level Review Meeting nung

adentsü metetdaktsü. Iba meeting ya Deputy Commissioner, Dimapur indang office nung anepdang 10:00 ako nungi tenzükba amentsü, anungji Dimapur district kübok aliba District Heads of Departments ajak arua adentsü metetdaktsür, ta sangdong ajanga ashi.

KPC ajanga asükhu lemsateper

Dimapur, Mongputeni/Oct. 14 (TYO): Taoba mapang Kohima Press Club (KPC) nung züngsem Duosanyü Stephen Keditsu mapang talangka shiranga arur October 13, 2024 nü Kohima nung asüba atema kanga kashir, ta KPC sangdong ka ajanga ashi.

Mangyimer kibong aser par jabaso Thepfüvilie Apisü Keditsu aser Neitho Keditsu den onoki asükhu lemsateper, shirnok KPC nung züngsem tajung lir.

NM Cable Network ya Duosanyü Stephen Keditsu-i shisatetba lir, koba Nagaland yimtiba Kohima nung cable television networks tulu rongnung mezüngbuba lir.

Pa asüba ya asenok asoshi tebu tajung ka samar alitsü aser onokia ner den külemi mang ayimer aser Tsüngrem taochi aser tesuneptsüba ner den lidakjang ta sarasademtsür. Asür tanüla tesunep nung anisüngzükjangma, ta KPC sangdong ajangasa ashi.

BJP Mokokchung District tongti zülur tasen shimogo



Dimapur, Mongputeni/Oct. 14 (TYO): BJP Mokokchung District indang tongti zülur ka ama October 14, 2024 nü nungi inyaktüsü asoshi Tiameren Longchar (MSc) shimogo.

charge Meyisupong aser lenirtem lia BJP Mokokchung District tir S. Bendang Aier-i shima liasü.

BJP Mokokchung District indang tongti zülur ya District vice president aser Koridang in-

Party-i Tiameren Longchar pelashishia agizüker aser pa lenisüba kübok party tashi itshia tuluba akumtsü imlar, ta sangdong ka ajanga ashi.

Manipur nungi kaketshirtem anogo 10 tour tenzükogo

Dimapur, Mongputeni/Oct. 14 (TYO): Lanurtem ajungmesoba maparen maneni inyakba nung shilem ka ama Indian Army ajanga Operation Sadbhavana kübok Manipur nungi Youth Ambassadors nisung taku asoshi anogo ter atema "National Integration Tour" sentong October 14, 2024 nü tenzükja liasü.

tesemtema semdangtsü. Youth Ambassadors tem yagi Victoria Memorial semdangtsü, Fort William nung Heritage Walk nung shilem agitsü aser HQ Eastern Command semdangtsü.

Iba tour ya General Officer Commanding (GOC), Red Shield Division ajanga Imphal East district, Manipur kübok Koirengei nung tenzüktsü.

Tawang nung parnoki Sela Pass, Sela Lake, Tawang Monastery aser Madhuri Lake semdangtsü aser 1962 India-China War nung takum bendanga agütsüba sepaitem nem Bum La aser Tawang War Memorial nung akum agütsütsü.

Iba tour mapang Kolkata, Tawang aser Shillong semdangtsü aser region nung sobaliba aser yimsü-yimpong balala parnoki ajangshitsü. Parnoki item yimtitem nung Army amenoka aliba

Tatema parnoki Shillong semdangtsü, aser iba mapang tebour tajungtem sema jajatsü. Parnoki Meghalaya indang Angh ajurutsü sentong lir aser October 23, 2024 nü Imphal nung iba tour tembangtsü.



October 14, 2024 nü Mumbai nung Annapurna Yojana sentong ka nung Maharashtra Chief Minister Eknath Shinde den Deputy CM ana- Ajit Pawar aser Devendra Fadnavis nunger tangokba noksa nung angur.

Modi sorkari Canada anema inyaktsü amokmerenogo

New Delhi, October 14 (Agencies): Tawa Ato kilonser Narendra Modi-i Laos semdangba mapang nung pai Canada Ato kilonser, Justin Trudeau mapang tatsüka ajuruba sülen India aser Canada na tsünga maneni mangatettep tasen ka adokogo.

Canada-i, Khalistani lenir Hardeep Singh Nijjar tepsetba nung India aser India nunger ambassador temi shilem agia lir, ta aitsü.

Modi-i aniba sorkari, iba onük nung tim teinyaktsü inyaktsü asoshi India dak temeden lir, ta metetdaksüogo.

Ministry of External Affairs-ia, Trudeau-i aniba sorkar yimtenren nükjiong ataloktsü atema India nung Canada Ambassador-i inyaker, ta

aitsüogo. "India nung Canadian High Commission-i inyakbaji India sorkari metetogo. Tang aliba sorkar yimtenren nükjiong ataloktsü atema Commission-i inyaker. Canada sorkari India nunger ketdangsertem nem tiyazü nung tai tongloksüba anema India-ia tim teinyaktsü inyaktsü asoshi temeden lir," ta MEA-i metetdaksü.

Canada-i Indian Ambassador Sanjay Kumar Verma nem tai tongloksüba dak sendakba nung MEA-i, "High Commissioner Sanjay Kumar Verma ya India nunger ketdangsertem rongnung tambutiba lir; pai küm 36 tashi tenzüka arudar. Pa Japan aser Sudan nung Ambassador inyakba den külemi Italy,

Turkey, Vietnam aser China linüktem nunga inyakogo. Canada sorkari pa nem tai tongloksübaaji aitsütsü tetemsü," ta metetdaksü.

Modi sorkari, Canada sorkari mapang shia tai tongloksübaaji India sorkari pungbapungba magitsü, ta amokmerenogo.

2018 küm Trudeau-i India semdangba nükjiongji vote bank atema liasü. Pai aniba Cabinet nung India anemertem-a züngoka lir, ta MEA-i metetdaksü.

2018 küm Trudeau kinüngtsü Sophie Trudeau, Khalistani kiralongrar Jaspal Atwal den külemi angu aser ibaji India-i ashishia liasü. Mumbai nung sentong ka agiba mapang India nunger yimtenren lenir ka tepsettsü merangba nung Jaspal Atwal densema lir.

Delhi sorkari January 1 tashi firecrackers nokdang

New Delhi, October 14 (Agencies): Diwali benjung atongtsü joko mapang ana nung lia Delhi sorkari firecrackers yangluba, rizünga ayuba, ayokba aser amshiba/apokba nokdangogo, aser iba tenokdangba ya sangküm January 1 anogo tashi alitsü.

Delhi nung mpoung kanga menenba azüoktsü nükjiong nung October 14 nungi sangküm January 1 tashi firecrackers nokdang.

Hombarnü Delhi Environment Minister Gopal Rai-i iba sangdong metetdaksü aser Delhi nung alirtem danga mopung menenba nokdangtsü atema sorkar den yaritepdaktsüner, ta mepishi.

Minister Gopal Rai-i X

ajanga, "Asükwa mongpu nung mopung tali menener, aser iba nungji ajemdaker tanü nungi tenzüka January 1 tashi firecrackers yangluba, rizünga ayuba, ayokba aser amshiba nokdang," ta metetdaksü.

"Delhi sorkari iba tenokdangba dak sendakba tetuyuba balala agütsüogo, aser onoki Delhi nung aliba nübur ajak dang amalitepsü mepishir," ta pai metetdaksü.

Delhi Pollution Control Committee-i iba tenokdakba dak sendakba temzüng metetdaksüogo aser aibelenertem nem temerenshi tulu agütsütsü.

Asükwa mongpu mapang kidanger state tem nung alu nung jana arongba, mopung kera

maonba aser kuli balala ajanga mopung kanga menener. Diwali benjung atongtsü mapang ana nung lia Delhi sorkari firecrackers tapu ajak nokdang.

Iba ozüng benoktsü atema Delhi police nem mapa nungloksüogo aser parnoki anogo shia DPCC nem report agütsütsü.

Minister Rai-i, "Tanü Delhi nung AQI 'poor' category nung lir. Asükwa mongpu atongba mapang nung temperature ajema akümdang mopungbo tali menener. Iba tebilemsü atema sorkari onük 21 benoka inyaker aser onoki iba tebilemsü ya nüburtem nem-a angatetdaksütsü," ta metetdaksü.

Jammu & Kashmir nung President Rule agienogo; sorkar tasen tentettsü

New Delhi, October 14 (Agencies): Tawa Jammu & Kashmir nung assembly elections takok ngua agiba sülen J&K Union Territory nung President rule agienogo.

Iba election nung takok anguba sülen National Conference tatong Tir, Omar Abdullah-i Lieutenant Governor Manoj Sinha ajurua sorkar akümsü asüngdangba sülen anogo ishika tsünga President Rule agienba osang ya Ministry of Home Affairs-i metetdaksü.

Home Affairs ministry-i sangdong ka ajanga, "Jammu and Kashmir Reorganisation Act, 2019 (34 of 2019) nung Arlla 73 aser India temzüng ajemdaker Jammu and Kashmir Reorganisation Act, 2019 nung Arlla 54 kübok chief minister meshimdang union territory of Jammu & Kashmir dak sendakba tetuyuba agienadoker," ta metetdaksü.

Tawa J&K assembly election nung National Conference-i menden 42 nung takok angu. Indian National Congress densemabo majority menden 46 ngua parnoki (NC) sorkar tasen akümsü atema LG dang asüngdangogo.

NC-Congress teloktep nung lenirji NC tatong tir, Omar Abdullah shimogo aser pai Jammu and Kashmir chief minister tenangzükba agitsü.

2017 küm June ita nung Mehbooba Mufti Chief Minister menden nungi anenba sülen Jammu & Kashmir nung President rule benoka liasü. Iba sülen Jammu & Kashmir nung governor's rule aser President's rule aiben atsülanga aruogo. Ajisüaka 2019 küm Centre sorkari Jammu & Kashmir nung Arlla 370 agien aser state jenjang agiener Union Territory ana aküm.

August 5, 2019 nü Parliament nung Jammu and Kashmir Reorganisation, 2019 benokba anogo nung linük temzüng nungi Arlla 370 agien aser Tir yimsüsüba benok.

India temzüng nung Arlla 356 kübok President's rule ya union territories nungbo mebenoker, anungji 2019 küm October 31 nü Jammu & Kashmir agi Union territory akümba anogo nung President's rule agiena liasü.

Ajisüaka Tiri sangdong ka ajanga, J&K Union territory nung lieutenant governor (LG) ajanga mapang telatet makai central rule alitsü, ta sangdonga liasü. Iba mapang nungjagi tenzüka J&K UT nung tongti ketdangserji LG, Manoj Sinha liasü.

Ajisüaka yaküm December ita nung Supreme Court-i Centre aser Election Commission dang J&K nung sorkar tasen atema election ayongzükba agitsü tuyua liasü.



October 14, 2024 nü New Delhi nung Chief Minister, Atishi-i Ato kilonser, Narendra Modi ajurudang tangokba noksa nung angur. Atishi-i Ato kilonser Modi dang Delhi sorkar aser Centre sorkar na tsünga amalitepa inyaktsü mepishiogo.

PM Internship schemes atema nisung lakh 1.55-i tenüng agütsü

New Delhi, Mongputeni/October 14 (Agencies): Prime Minister Internship Scheme atema portal nung registration tenzüka sülen ghonda 24 tsünga nisung lakh 1.55-i tenüng agütsü.

Ministry of Corporate Affairs osang ajanga ashiba agi, Honibar nikongdang 5:00 ako nung iba scheme portal nung lemsatepba sülen ghonda 24 tsünga nisung 1,55,109-i internships atema tenüng agütsü. Iba scheme kübok nisung lakh 1.25 agizüktsü.

Iba scheme atema corporate affairs ministry-i portal 'www.pminternship.mca.gov.in' lemsatep aser iba maongka ya arrshi küm 21-24 purtem atema lir.

2024 anogo nungi tenzüksü aser ita 12 tashi ita shia sen 5,000 teyari agütsütsü aser intern shia nem khen atema sen 6,000 agütsütsü.

Taoba hopta ministry-i, iba portal nung oil, gas & energy, travel & hospitality aser automotive densema sector 24 nung intern atema 80,000 bendenlokogo, ta metetdaksü.

Union Budget 2024 nung Finance Minister Nirmala Sitharaman-i iba scheme sangdonga liasü, aser iba project mezüngbuba shilem nung sen crore 800 shi indoktsü. Iba scheme benokba nükjiongji India nung aliba company 200 nung ita 12 internship agidaksütsü asoshi lanurtem nem maongka agütsütsü atema lir.



October 14, 2024 nü Ranchi nung Jharkhand Chief Minister Hemant Soren-i tawa shimba Community Health Officers (CHO) nem mapa nung shimba shidi agütsüdag tangokba noksa nung angur.

Internships ji December 2,



TIR YIMYIM YIMOBILEM (EDITORIAL)

DIMAPUR SANGTENNÜ, OCTOBER (MONGPUTENI) 15, 2024

Naga nunger yiar asü ?

Naga nunger yimten nüchiso bushia-bushia tokolok meshitak kümer yiar amato, telok ka agi telok metsü dak tali kümer yimten nüchiso bushir asü mesüra rongsen bushiar mejangjatet ka kümogo. Alima nung tangar kintema, India dena, yimten nüchiso bushiba mapang timtem takoksa ajuruba indang asenoki meteta lir. Mahatma Gandhi-bo takar chir aser tashitemeteter liasü saka paibo süoshi tajung dena agizüka yur temanga mayim dhoti sü ka agir, chappal ka semer aiben chia mechiyong tetsüng agi jaja aser lumia India yimten nüchiso tongpang nung nokdak. Iba denji tanü asenok Naga yimten nüchiso bushirtem taküm yimya aser parnok inyakyim medemdangra, asenokbo nüchiso bushir masü saka sen aser hon taribi bushir amai kümogo. Aji oda, tanü Naga nunger asoshi yimten nüchiso bushitsürtembo chuba ki ama nung lia, hon zük azüker, gari tajung nung mener pei nübertem rongnung business inyakerkem dang tashiyim agi sen meshia taküm alitsüba ya nüchi mapa masü aser nüchiso bushiba mapaa masü. Ya kechi bushiar tebushiri dang meteta lir ! Aji oda, tawa Naga nunger nüchiso bushir telok kati Naga nunger contractor ka amokmerena sen meshiba agi Naga nunger rongnung mepelatep tulu adokba mama alidang, ano tang Dimapur nung sen meshisü atema business inyaker Naga nunger chanu ana pua bener aoba tashiyim mapa tamajung yagi nübertem kanga jashidaktsüogo. Iba tatalokba ya ataloker külen lokti balalai Naga nunger yimten nüchiso bushir telok, kobai nisung pua bener ao aser sen meshi, iba telokji anema taitsüba osang sangdong balala nung agütsüba yagi Naga nunger nübertemi Naga yimten nüchiso bushir teloktem ya nüchiso bushir masü saka tashiyim agi sen sarua taküm alitsü merangertem danga ta angatetdaksür. Ibaji Naga nunger ajak atema tekümdangtsü mapa aser mapang ka lir. Aji oda, aremer maremtet, tang amaji nisung pua bener orr mezüngmeshi dang, Naga nunger nübertemi Naga nunger yimten nüchiso bushir telok anema ain adoka nokdak nungbo, panüji Naga yimten nüchiso tongpang chireper asütsü. Iba amaji mataloktsü atema tang Naga nunger telok metsür semerka kümer Naga yimten nüchiso bushir amai sayua sen bushir teloktembo anenadoktsüla. Yimten nüchiso bushiba o hon taribi aser sen bushiba mapa na kenyongi balala, teburshirtem taküm yimya aser jakla nunga reprangtetter. Aji oda, timtemba agi yimten nüchiso bushir saka timtem terakata magi yimten nüchiso bushinertemjibo taila yimten nüchiso bushirtem asütsü. Item jagi pei agitsü ali rongsen bendentsü, nübertem tsübudaktsütsüsa inyaktsü aser nübertem tetsübu tia nung yutsütsü. Iba ama tia nungji tanü Naga nunger nübertem Naga nunger yimten nüchiso bushir telok metsü dak tali den koba telokang shitak aser koba telokang meshitak-ar mejangjatet timtem tulu nung lir. Item telok ajunga jagi sen meshitsü aser magütsüra pua bener aotsü aser oda-odabo taküma mapayutsü. Ibajibo Naga nungertemi metizüktettsü, anungji külen Naga nungeri Naga nunger pua bener oa sen meshir aser ano külen Naga nungertemi Naga nunger pua bener oa sen meshir telok anema apusor ta Naga yimten nüchiso bushi tenzükba tongpang agi Naga nunger nübertem külen aser Naga yimten nüchiso bushir teloktem külen ta ser raraba tongpangang ka küma odagi. Ibai Naga nunger ajak asoshi alima tsüngdang menüdong akümba mapang ka asütsü. Küm 20 jakdang, NCSN telok ana dang aliba mapang, Nagaland state government-i Naga yimten ken o ya India den shitak jembia odagi ta ashiba sülen, ken o shitak jembia jembia NSCN telok paika ya kümer Nagaland nung lanurtem business-a junga meinnyaktettsüsa meinprongdaktsüba tensa ya Nagaland government-i yanglutetba mapabo masütsü imlar. Telok paika kümdaktsüba nung ya shibabo tajangzük angutsü ? Aji oda, Naga nunger rongnung lendong matalok dang aser maksü tulu majurudang, Naga nunger yimten nüchiso bushir telok ajak ya anentsüsa, Naga yimten ken o telatetba kati yaktasa yakta arutsüla.

OLEMSABANG

INDIA LIMA MEIMCHIR AJAKI ANGUBA TENÜK KULI

~ Mr. Temsü Jamir, Mokokchung

Hindu nungertemi nashi shibo machir, saka mamatzü ajembaji shi achiba den saku dang. Ano Hindu nungertemi nashi tepong tulu ajak gari nung oset sünga bener ladi agi züka bazzari anir oa shishir. Ano alu halt alaba mapang kongrasüka anishir kodang nashi kongraseta südir ali nung maremer, saka aonung jana indokba tesem nung toktsür. Itemji aonung azü aser shirongtemi aser anüngdang Hoken warotemi achir. Item city memerük ngua asen Nagatsür Society temulungertemi PM Modi nungi temelaba meshir Public den yaritepa inyakba asenoki radio osang ajanga angashir. Anungji tang mapang India-i Naga kin ajemrepa tebang nempangtsüba nungi Naga nungertemi ochi ola adoka tasü ita ayimdentsü mapang tongja tongogo ta ayongzöker.

ALUYIMER ASOSHI METSÜ MOL (FERTILIZERS) AMSHIYIM NUNG SHISA LUYIM

*Courtesy: Division of Soil Conservation,
Krishi Vigyan Kendra Mokokchung*

(Yashi adok nungi...)

3. Single Super Phosphate (SSP)- Iba mol tereprangtsü ya tera temesüng (aut sentsu) lir. SSP ajanga Phosphorus agütsür anungji DAP den külemi mamshitsüla, kechiyong anapronglai kesa mol (phosphorus) dang agütsür. SSP kg ka nung 16% phosphorus alir.
4. Muriate of Potash (MOP)- Iba mol tereprangtsü nung temerem (ita long tsüksa ba amai). Iba mol ajanga Potassium agütsür aser MOP kg ka nung 60% Potassium alir. MOP ya naro apungba aser süngjang adangba nung yarir aser maneni tashidak tapu balala nungi tsünüsempongtsü ya kümzüka ayur.

Ali pH ta asuba ya kanga tongtipang lir. Asen Mokokchung nung ali ya timbaka tasen (pH 5 or tajemba). Kodang ali tasen südir mol peria ali nung aliyonga, itemji tsünüsempongtsü temi magitetter. pH ya tenet (7) tashi asü nung dang ali nung mol temo alibatemi shitak agitetter. Tenet (7) dang nungi tajemba asu nung timtim balala ajangshir, aser item ali ji tasen (acidic) asür. Item metsu mol ya shitak inyakyim nung mamshira maneni ali ya tasenba kümdaktsütsü. Anungji ali tanang kümdaktsütsü asoshi inyakyim tem reprangshitsüla.

Ali nung pH atsükettsü/ tanang kümdaktsüstü asoshi liming (Agri grade Lime) ajanga inyaktsü akok. Mesüra alu jana arongba mitsü aser mijang meyokteper enokba ajanga tera bo yarir. Maneni iba den sendaktepba nung experts tem den tongteprateptsü junger.

Metsü mol ya Organic mol (vermicompost / tzüla mol, nashi sü mol, compost mol, an sü mol koba mapang agia mol junga kümer alibatem, etc.) den külemi amshitsüla. Organic mol dang amshiba jia junger saka aiben peria mangür aser anepalüa meyutetter mesüra mol tenüngdakbatem ajak bo magütsütetter. Anungji tajungtiba ji ana ya külemi amshitsüla. Maneni biofertilizers (takum aliba mol), green manuring (ali nung tu aser tetong lanu enoker mol küma shizüka yokba), biological agents (mozü mamshi-i sungko aser tu tedong chitsüba longpen mesen tamajung tepsettsüba takum aliba aluyimer asoshi mesen tajungtem), ajak ya külemi amshiba nung tzü mopung aser ali nung timtem mali, iba den külemi aseni tsünüba aonsotsü mesüra sungjang lijang tajungtiba nung züsentettsü. Iba dang ya Integrated Nutrient Management ta ajar. Tanü asen tendak shisa shitak akia aluyimba nung inyakyimra asen Naga nunger-ia tangar dak memetaloki asenok yaribo züsentettsü koka lir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Aoyimti Baptist Arogo nung differently-abled purtem atema sentong ka agi



Dimapur, October 14 (TYO): Differently-abled purtem asoshi anogo ka saisapong aser kenten menu sentong ka Aoyimti Baptist Arogoi ayonga October 12, 2024 anogo nung agiogo aser iba sentong nung tsürabur, tesayurtem aser teyaritepertem mezüngsemi parnok ajak agi nisung 99 arua aden, ta Aoyimti Baptist Arogo nung pastor, Rev. Temsü Jamir-i sangdong ka ajanga metetdaksü.

Deaf Biblical Ministry, Living Bread Ministry, Anitet Early

Intervention School aser Arogotem nungi arua shilem agiogo. Iba sentong nung yariteptsü asoshi Special Olympics Nagaland nungi Ms. Amongla Chief Coach, Ms. Achila, Mr. Rencha aser Mr. Achum parnoki taküm, mapang aser sempet tenla-a yaritepba asoshi Arogoi kanga pelar.

Arogoi iba sentong achaayanga agiba nükjidongji, parnok ya aiben wajaki arua shilem magiteter, aser parnok asoshia Arogotemia sentong

balaka renema mayongteter, anungji kenü anogo dang süaka parnok o parnok na metetpelatepa aser parnok dak aketba sempet tajungtem agi parnok tsüngda ajungshitepa, parnok nem tepela aser temeim agütsütsü asoshi iba sentong ya ayongogo.

Iba sentong asoshi taküm, mapang aser rongsen tenlar ajak dang kangasa pelar aser Tsüngremi moajangma ta sarasademtsür, ta kasa sangdong ajanga lemsatöp.

China nung Tenla kitem nung linük Tir, Xi noksa ayutsü tuyu

October 14, 2024: China nung Communist sorkari Catholic aser Protestant Arogotem anema maneni inyaka Arogotem dang Tenla kidang Yisu Khrista noksa agiener linük Tir, Xi Jinping noksa amshiang ta tuyuogo, ta U.S sorkar report ka ajanga metetdaksü.

Chinese Communist Party (CCP)-i linük nung yimsü dak sendakba inyaksangshi ajak anema inyaker, ta kasa report nung shia lir.

“Ketdangsertemi Catholic aser Protestant Khristantem Communist tangatetbatem benshidaksütsü atema inyaker,” ta U.S. Commission on International Religious Freedom (USCIRF)-i metetdaksü.

“Sorkari Tenla kitem nung Kangkitem agientsü aser Yisu Khrista mesüra Mari noksa melen Tir Xi noksa ayutsü tuyuba den külemi Tenla ki kikümbang nung Chinese Communist Party yimtemtem

zülua ayutsü tuyu. Sorkarisa yimsü dak sendakba Lai tekongtem mita repranger, CCP-i melaba yimsü kakettem dang amshidaksür aser Khristan lenirtem dang CCP tangatetba sayutsüngitsü asoshi tuyur,” ta USCIRF-isa metetdaksü.

Yimsü anema inyakba mapatong ya Xi-i tenzük aser ibaji linüki azüokba yimsü organizations-ia pusemer, ta kasa report ajanga metetdaksü.

Ajisüaka Khristan meyrjang aikati sorkari azüokba Arogotemji magizüki mimshia Tsüngrem külemer, ta report nung shia lir.

Sorkar ketdangsertemi temzüng tasen yanglua Communist tangatetbatem benoker. Sorkari Khristantem dang masü saka Buddhists, Muslims aser Taoists yimsü amangertem matsüngdanga item özüng benoker.

2021 küm tashi nung China nung nütsüng billion 1.4 nungi nütsüng shilem 18 Buddhist

nungertem liasü, nütsüng shilem 5 Khristantem aser nütsüng shilem 2 Muslim nungertem liasü. China nungsa Taoism, Falun Gong aser akhi yimsü amangertem-a aika lir.

ANOGO ABEN TSÜNGREM DEN

Temulung Azüokba

"Khrista dak koba temulung liasü, aji nenok daka liang" (Filipi 2:5)

Khrista mulung atema asenoki asüngdangtsüba mesüra mepishitsüba masü. Ibai Khrista shiba asenok den taküm lir pa tabensaba shilem lir. Khristai asenok dang koda inyaksü aser lemtettsü iba sayuba atema tenüngsang agütsütsüla.

Filipi 2; 5 nung kilir ka akümba indang ashir. Aikati kilir ka asütsübaji tasak ta bilemer. Khristai kotak nungi alimai alua, sentsüwangshi nungi kangki dangi oa tenzüktsü tatishitsü sayu. Tsüka aliba pur dangi Pai temeim aser taochi ain sayuba atema asenoki "amen" ta ashir, aser tasü tonga pa den jajatsü tenangzükba agir.

Iba tekong yagi asenok dang atutsüba masü saka alutsüba, tushitaksütsüba masü ajemalua alimelen sarur aser temenen purtem den chiyungtsüba Khrista nem sayudakjang ta ashir. Kibubai iba tatishitsüji sayu. Tsüngrem Nisung ka ama ibaji Pa yimya nung sayu. Pai ajak asoshi tilatiba aküm aser tashi ajak asoshi tashi anga.

Asenoki bendanga agütsütsü Khristai asenok atar. Asenoki pai mulungba nung bendanga agütsüra, Pa alima nung aliba mapang inyakba ama asenokia inyaksü.

Armenia kübok Artaxata yimti nung Tenla ki ka ngutetogo



Sub-Saharan Africa nung Khristantem atema sarasademtsü ayongzük

October 14, 2024: Open Doors US-i alima tesem balala nung Arogotem dang November 3 nü International Day of Prayer anogomong nung sub-Saharan Africa nung aliba Khristantem atema sarasademjang, ta ayongzük.

Sub-Saharan Africa nung Khristan million 16 bo yimsü dak sendakba rara ajanga tesem balala nung prokshia lir.

Open Doors-i Arogotem den sarasadem nung bilemtettsü onüktem lemsatöpogo.

Sub-Saharan Africa nung aliba linüktem- Nigeria, Kenya, Mozambique, Burkina Faso aser Uganda nung Khristantem kanga reshikangshir.

“Reshikangshi ajangshiba Arogotem atema November 3 nü sarasademtsü onoki Khristantem ajak ayongzük,” ta Open Doors US Tir aser CEO, Ryan Brown-i metetdaksü.

“Iba anogomong ajanga, asenok ajak ya temang ka nung shilem kaka, aser temang nung shilem ka timtemra asenok ajak timtemer, ta asenok nem nenshia metetdaksür,” ta pai ashi.

2019 küm nungi 2023 küm tashi nung Nigeria nung Khristan 16,000 dak tali tepsetogo, ta Observatory for Religious Freedom in Africa-i metetdaksü.

October 14, 2024: Armenian-German research team-i Ararat Plain nung aliba Artaxata yimti (tangbo Artashat) nung aliba Khristantem indang Tenla ki tejen ka ngutetogo.

University of Münster-i sangdong ka ajanga, Tenla kiji ‘octagon’ mesüka yanglu aser Kangki mesüka ulushia asü, ta metetdaksü.

National Academy of Sciences of Armenia aser University of Münster nungi archaeologist temi iba Tenla ki shilem kar ali tur geophysical methods amshia bushisüngdangogo.

2018 küm nungi tenzüka

Armenian-German research team-i Ararat Plain nung aliba Artaxata yimti bushisüngdang. “Aso 4buba mapang nung aliba kiojen ya linük nung Tenla ki tejentiba lir aser iba ya akhidang Armenia nunger Khristantem Tenla ki liasü,” ta University of Münster nung Professor, Achim Lichtenberger-i metetdaksü.

“Tang tashi nungbo yangi Octagonal Tenla ki menguteti liasü, ajisüaka Eastern Mediterranean region nungbo item ama Tenla ki aika lir,” ta National Academy of Sciences of Armenia nungi Dr. Mkrtych H. Zardaryan-i metetdaksü.

Tenla kiji Kangki mesüka ulushia asü aser sabang nung amshiba süngtsük ngutet. Itemji Aso 4buba AD mapang nung asüba liasü. Octagon shape nung asüba Tenla ki tasazükji metre 30 shi lir aser atemji lisem aser terracotta tiles agi yanglu.

Iba tesem nungji marble-a angu, anungji Tenla kiji kanga junga asüba liasü aser marble ji Mediterranean nungi bener aruba liasü, ta angateter.

September ita nungi German-Armenian team-i Armenia nung iba project inyaker aser maneni ali tua bushisüngdangtsü.

AO OSHI ANGAZÜKDAK:



Tanük

(n) aianui asoba teburtem (maternal nephews)

* Tiaba tanük nunger aika lir.

Tanüker

(n) mitkar, terepranger (watchman, keeper)

* Tir ki tanüker aikati anüker.

OLONG PAITEP # 6952

15x15 crossword grid with numbers 1-17 indicating starting positions for words.

TIPILEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6951 TELANGZÜBA

TIPILEN :

- 1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among,
12. Miim, 13. Anem.

NAI-A YA METETTER MA



Mapang tekaratiba nung New Seven Wonders of the World sema senzüba atema Indian Traveller Sujoy Kumar Mitra-i otsü tasen ka yangluogo. Mitra-i anogo 5, ghonda 17 ser minute 28 nung New Seven Wonders of the World sema senzüba atema Guinness World Records-i kuli agütsüogo. Pai September 2, 2024 nü Petra, Jordan nungi tenzükba September 8, 2024 nü tembang.

Tripura sorkari nija super speciality hospital atema ali anepaluogo

Agartala, October 14, 2024 (Agencies): Tripura sorkari super speciality hospital ka lapoktsü atema ali anepaluogo ta Chief Minister Manik Saha-i ashi.

Imphal nung amenoka aliba healthcare entity- Shija Hospitals and Research Institute (SHRI)-i Tripura nung super speciality hospital ka lapoknüba tebilemba lemsatepa liasü.

"SHRI-i jangraba ajanga state sorkari super speciality hospital (Khayerpur, West Tripura) ka lapoktsü atema anepaluogo. Parnoki Tripura nung Rs 700 crore endoka healthcare facilities renloktsü nangzükogo" ta CM Saha-i ashi.

Agartala nung Karl Landsteiner Auditorium, AGMC aser GB Pant Hospital nung STAR-NCD state-level launch

nung pai iba osang lemsatep. "State sorkari temulung agütsüba wadangtem rongnung health services ka lir. State sorkari modern health services agütsütsü tenangzükba lir. Iba ya atongtsü atema state health department-i mapatong balala inyakdar" ta paisa ashi.

STAR-NCD project ya ICMR indang National Health Research nung tongtipang mapang ka lir.

Manipur nung tashiyim agi sen sarur telungpur 7 apu

Imphal, October 14, 2024 (Agencies): Manipur kübok Imphal West district nung sepaitemi telungpur 7 apu.

"Langol Game village nung Kangleipak Communist Party (Nongdrenkhomba) züngsemtem aliba osang angashiba sülen sepaitemi mita aodang tetsür ka dena telungpur 7 apu" ta SP Ksh Shivakanta Singh-i ashi.

Parnok ya L. Alin (26), K.

Rohit Singh (23), Sanju W. (20), P. Thoiba (26), W. Hero (21), Y. Bikash (23) aser Henthoibi M. (41) nunger ta jangjaogo.

"Tashiyim agi sen saruba inyakyim kanga bulua akümba ajanga nübertemi mepelaba lemsatep. Police-i iba tensa asadangdar aser tatalokba kar atemabo public-i osang melemsatep lir" ta SP Shivakanta-i ashi.

"Tesüiba anogo pezü pungu

tsüngda Imphal West district police-i tashiyim agi sen saruba dak sendakba nung nisung 11 puogo. Onoki National Security Act (NSA) kübok ken o benoktsü" ta pai ashi.

"Onoki National Investigation Agency (NIA) dangi ken o tem abentsü aser public-i tashiyim agi sen saruba indang osangtem police nem sangoktsütsü ayongzükür" ta SP Shivakanta-isa ashi.

Assam Police-i Guwahati anasa Rs 4.5 crore alag drugs apu



Guwahati, October 14, 2024 (Agencies): Assam Police Special Task Force (STF)-i Rs 4.5 crore shi alang drugs puogo.

Nagaland nungi Guwahati tashi truck gari ka nung drugs bener aruba osang angazükba

sülen STF-i Jorabat nung gari soter mita repring.

Jorabat ya Kamrup Metropolitan district nung lir aser parnoki truck gari (AS01-RC-2336) mita repringdang plastic soap case 45 nung heroin gram

537.2 bena aliba angu.

STF-i iba dak sendakba nung truck driver Rananjay Mandal (46) puogo. Pa ya Barpeta district nungi lir aser Guwahati kübok Basistha area nung telidak lir.

GOVERNMENT OF NAGALAND OFFICE OF THE DIRECTOR GENERAL HOME GUARDS', CIVIL DEFENCE & STATE DISASTER RESPONSE FORCE NAGALAND, KOHIMA

NO.HG/Estt(A)-3/ 2021

Dated Kohima, the 7th Oct'24

ADVERTISEMENT

Last date of Form Submission 30/10/2024

1. In pursuance to Govt. approval No. POL-B/HG/ESTT-2/1/22 dated 03rd November 2023, applications are hereby invited from bona fide indigenous inhabitants of Nagaland for filling up the under mentioned post under the Department of Home Guards', Civil Defence & SDRF in the manner prescribed below:-

Table with 5 columns: Sl.No, Name of post, Pay Matrix, No. of vacancy, Reservation for Backward Tribe. Row 1: 1. Carpenter, Matrix level-3, 1 (one) post, -

2. The Educational Qualification, Age/Age relaxation, Mode of Recruitment, Terms & Conditions, Disqualification grounds for Medical Fitness Test-Annexure-I can be downloaded from the official website (www.hgcdsdrf.nagaland.gov.in) .

3. The application with required certificates/documents should be submitted to the Office of the Director General, Home Guards, Civil Defence & SDRF Nagaland Kohima during office hours.

4. Application form can be downloaded from the department website (www.hgcdsdrf.nagaland.gov.in) and submitted at the Office of the Director General, Home Guards', Civil Defence & SDRF, Nagaland, Kohima.

5. Application sent through Post/Email or any other Electronic means shall not be accepted.

Sd/- AOTEMSU, IPS Commandant General.

Rengma Wrestling Association amenokogo



NWA ketdangsürtem, coach tem, NWA nungi wrestler tem, RWA ketdangsürtem aser camp nung shilem agirtem tangokba noksa nung angur.

Tseminyu, Mongputeni/October 14 (TYO): Nagaland Wrestling Association (NWA) tawabangba kübok Rengma Wrestling Association (RWA) aser NWA na longjemer Hombarnü Town Hall, Tseminyu Town nung anogo 10 atema Intensive Wrestling Training Camp 2024 tenzükogo.

Alakteta jaoker ama iba camp tenzüksüba mapang NWA tir Vivolie Kezo-i, tetsü tebou mapa nungi asaya aruba iba wrestling asaya koda tongtibang iba indang lemsatepa liasü.

Kezo-isa, RWA tentetba indang otsü lemsatep aser iba lokti tentetba nung shilem agirtem ajak nem tenüngsang agüja liasü.

Dehradun nung October 3 nungi 6 tashi AITWPF 12 National Traditional Wrestling & Pankration Championship 2024 nung NWA-i shilem agiba indang pai lemsatepa liasü. Iba asayamung nung NWA-i medal 54 angu koba NWA asoshi otsü tasen ka asütsü.

Kezo-isa, Asian Belt Wrestling Championship koba Kohima nung 2024 küm

November 17 nungi 23 tashi asayatsü lir iba indang metetdaksü. Iba asayamung nung Africa nungi linük ana aser Europe nung linük 3 nungi asayartem aser Asia nung linük 20 dak tema nungi asayartemi arua shilem agitsü jangaogo, ta ashi.

Kezo-i, Naga Style wrestling ya iba asayamung mapang medal event ka ama asayatsü renema lir ta shia Rengma nung lanurtem dang NWA championships nung asayatsü atema renemshitsü ayongzüka liasü.

Maneni Kezo-i ashiba agi, Lotha Wrestling Association (LWA)-i ayongzüka September 27 nungi October 8 tashi iba amala mesükba camp kaogo, Pochury Wrestling Association (PWA)-i ayongzüka October 7 nungi 16 tashi camp agidar. Ano Sumi Wrestling Association (SWA)-i ayongzüka October 21 nü nungi tenzüka camp agitsü lir.

NWA tenüng nung Kezo-i, taruba 17buba International Naga Wrestling Championship 2024 koba December 4 nungi tenzüka Khouchiezie nung

asayatsü lir iba asayamung nung shilem agitsü atema RWA wrestlers tem jaokogo. Paisa, camp nung shilem agiba wrestlers tajungtibatem nem iba asayamung nung shilem agitsü atema maangka agütsütsü ayongzüka liasü.

Anogo 10 agitsü aliba camp nung shilem agitsü asoshi tesem balala nungi wrestlers 22 züngoksema lir.

Iba sentong nung taoba mapang NWA Champions aser Tribal Champions Venuzo Dawhuo, Menusetuo Yiese, Kezhaselu-o Pienyü aser Huluyi D. Vadeo nungera iba dena liasü. Sumi Wrestling Association (SWA) nungia lenirtemi iba sentong nung shilem agiogo.

NWA nungi Kevizhakho Suokhrie, Besuveto Cümü aser Kedingau nungeri camp nung shilem agirtem nem tangazükba agütsütsü.

Sentong nungsa RWA tir Rhuchuyhung Seb-i, iba sentong ya Rengma Wrestling Association (RWA) amenokba anogo lir ta ashiba den NWA nem parnok teyari asoshi kanga pelaba lemsatepa liasü.

Sindhu, Sen nati anir India nung asayartem Denmark Open asayatsü

Mongputeni/October 14, 2024 (Agencies): India nung nungtugu badminton asayar PV Sindhu aser Lakshya Sen nati anir India nung asayartem Mongolbarnü nungi tenzüka USD 850,000 Denmark Open Super 750 nung asayatsü.

Asayar anaprongla ya taoba hopta Vantaa, Finland nung Arctic Open nung asayaogo, ajisüaka Sindhu mezüngbuba round nung tsük aser Sen-a tanabuba round nung tsüka liasü.

Arena Fyn, Odense nung taruba asayamung nungbo junga asayatsü atema tenaprongla imla alitsü, koba 2024 BWF World Tour nung asayamung 13buba asütsü.

Sen, shiba Paris Olympics nung pezübuba nung tembanga liasü, pa taoba hopta Chinese Taipei nung asayar Chou Tien Chen-i tsükdaksü.

Tang iba asayamung nung

pa mezüngbuba round nung China nung asayar Lu Guang Zu den asayatsü. Tena tang tashi nung khen danga asaya mali.

Mezüngbuba round kokra Sen tanabuba round nung Indonesia nung asayar Jonatan Christie mesüra Thailand nung reigning world champion Kunlavut Vitidsarn na rongnung ka den asayatsü.

Tetsür kija asaya nung Sindhu mezüngbuba asaya Chinese Taipei tsür Pai Yu Po den asayatsü aser iba asaya kokra la China tsür Han Yue den asayatsü.

Tetsür kija asaya nung ano Malvika Bansod, Aakarshi Kashyap, aser Unnati Hooda nungera asayaba angutsü.

Bansod, shiba China Open nung quarterfinal tonga asayaogo, la Vietnam tsür Nguyen Thuy Linh den mezüng asayatsü aser Kashyap Thailand tsür Supanida

Katethong den asayatsü.

2022 Odisha Open koker alila Hooda mezüngbuba asaya USA tsür Lauren Lam den asayatsü.

Iba asayamung nung India nung tepur tarep asayar ka danga masayatsü, saka Treesa Jolly aser Gayatri Gopichand na tetsür tarep asaya nung Malaysia tsür Pearly Tan aser Thinnah Muralitharan na den asayatsü.

Swetaparna aser Rutaparna nata Chinese Taipei tsür Chang Ching Hui aser Yang Ching Tung na den asayatsü.

Tarep temeyoktep asaya nung B Sumeeth Reddy aser Sikki Reddy na Canada nung tarep Kevin Lee aser Eliana Zhang na den asayatsü aser Sathish Karunakaran aser Aadya Variyath na Indonesia nung Rehan Kusharjanto aser Lisa Kusumawati na den asayatsü.

Pakistan den tanabuba test nung Stokes asayatsü

Mongputeni/October 14, 2024 (Agencies): England captain Ben Stokes, Pakistan den tanabuba Test nung asayatsü renema lir. Iba asaya ya kasa Multan pitch nungsa asayatsü.

Stokes, shiba hamstring yiruba ajanga August ita tetenzük nungi masayai liasü pa tanabuba Test atema renemshiba mapang Deobarnü net nung ball kanga junga onshio. Iba asaya ya Mongolbarnü tenzüksü

Tanabuba Test atema England team nung Gus Atkinson aser Chris Woakes na meshim aser anisüngzüka agütsüogo. Kasa mapang nung seamer Matt Potts team nung züngoksemogo. Pa August ita Sri Lanka den Lord nung tatembangbuba Test asaya liasü. Pakistan den mezüngbuba test innings ka agi kokaka England nung bowler tem kanga meranga asayadaksüogo. Atkinson-i over 39, Brydon Carse-i over 38 aser Woakes-i over 35 ona liasü. Atkinson aser Woakes na England team kidang asayaba Test trok prongla nung asayaogo, ajisüaka Carse bo June, July aser August masayaba sülen pa tashi taitba alitsü imlar.

Ben Duckett, shiba mezüngbuba Test nung

tanünübuba temeyong yirua liasü, pa taneptsü nguogo aser maneni team nung züngoksema lir aser Stokes nem No. 6 jenjang agütsütsü atema Jamie Smith No. 7 nung asayatsü.

England team nung spinner ji Jack Leach, Shoaib Bashir aser Rehan Ahmed nung asütsü. Mezüngbuba test nung wicket ka dang agiaka Bashir team nung maneni züngoksemogo.

Pakistan Cricket Board (PCB)-i mezüngbuba Test asayaba pitch dang amshitsü telemteba agiogo, kong run aika yanglua liasü.

Mezüngbuba innings nung Pakistan-i run 556 yangluba sülen England-i asayar 7 out sür run 823 yanglu aser declare süa liasü.

Iba sülen England-i asaya innings ka aser run 47 agi koka liasü. Asaya kanga mejungi tamakok anguba sülen Pakistan-i, taoba captain Babar Azam aser seamers Naseem Shah aser Shaheen Shah Afridi nung team nung mezüngoksem.

Tanabuba test atema England team: Zak Crawley, Ben Duckett, Ollie Pope, Joe Root, Harry Brook, Ben Stokes (C), Jamie Smith, Brydon Carse, Matt Potts, Jack Leach aser Shoaib Bashir.

Chepngetich-i Chicago nung marathon world record ka yangluogo

Mongputeni/October 14, 2024 (Agencies): Kenya tsür Ruth Chepngetich-i Deobarnü Chicago Marathon nung world record tasen ka yangluogo.

Arishi küm 30 tain asayar yagi alizüng ghonda ana minute teku aser second 57 nung tongteta Ethiopia tsür Tigst Assefa-i world record yanglur aliba minute ana agi ajateta liasü.

Chepngetich ya tetsürtem rongnungi marathon ka ghonda ana ser minute 10 majung tsüngda asema mezüngbuba asayar kümogo.

Assefa-i, 2023 Berlin Marathon nung alizüng ghonda ana minute 11 aser second 53 nung asema otsü tasen ka yanglur liasü.

“Ni kanga pelar aser kanga nema danga bilemer. Iba ya kü nikjidong atalokba ka lir,” ta Chepngetich-i ashi.

“Ni world record indang bilema kanga meranga inyakogo aser ni kü nükjidong tongtetogo,” ta laisa ashi.

Chicago nung tasembenbuba asema mapang Chepngetich-i takok ngutetogo.

2022 küm lai külem Kenya tsür Brigid Kosgei second 14 agi memenepe liasü.

Taoba küm trok tsüngda tetsür marathon asemtepa nung asayartemi alizüng takaratiba tongtetba pongu rongnung pezübo Chicago nung asema mapang tongteta liasü.

Kasa mapang nung tebur asemtepa Kenya nungersa John Korir-i koka liasü. Asaya akokba sülen pai taoba küm iba asemtepa akoksang aser world record bener alisang Kelvin Kiptum nem aküm tetushi agüja liasü.

Korir-i iba asemtepa ya ghonda ana, minute ana aser second 44 nung alizüng tongteta koka liasü.

Ethiopia nung Mohamed Esa tanabuba jenjang nung aser Kenya nung Amos Kipruto tasembuba jenjang nung tembanga liasü.

Kiptum-i ita pezü tejakdang Chicago nung alizüng ghonda ana ser second 35 nung tongteta otsü tasen ka yanglu, ajisüaka pa arishi küm 24buba nung gari tsükokba lendong ka nung densenba sülen asü.

BILEMDANGANG

“Temeimi tatem maka tatok agütsür.”